

Ilageeqarneq pillugu Inatsisartut inatsisissaattut siunnersuut

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Saqqummiussissut

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Siullermeerneqarnera

Ilageeqarneq pillugu inatsisartut inatsisissaattut siunnersuut matumuuna Naalakkersuisut sinnerlugit saqqummiutissavara.

Ilageeqarneq pillugu inatsiseqarneq sivisuatsiaamik uninngasimavoq inuiaqatigiit nalinginnaasumik ineriartorsimagaluartut, taamaalillutillu tassani suleriaatsit ullutsinnut naleqqukkunnaarlutillu naapertuukkunnaarsimallutik.

Inatsisissatut siunnersuut Inatsisartunut 2008-mili saqqummiunneqartussaagalarpoq, siunnersuulli tunuartinneqarluni apeqqutit *Namminersorluni Oqartussaanerup eqqunneqarnerata kingorna Nunatsinni ilageeqarneq pillugu nassuiaat*-mi ersarinnerusumik sammineqartut pissutigalugit. Tamanna maanna aaqqinneqareerpoq, nuannaarutigaaralu Naalakkersuisut sinnerlugit Inatsisissatut siunnersuut saqqummiussinnaagakku.

Ilageeqarneq pillugu inatsisissatut siunnersuutip matuma tunuliaqutaraa qulakkeerumaneqarmat Ilagiinnik sullissineq aammalu ilagiit kissaatigisaat pisariaqartitaallu naammassiumallugit taamatuttaarlu qulakkeerumaneqarluni ilagiinnik sullissineq pisuni nuannersuni, artornartuni, ulluinnarnilu inuiaqatigiinnik ikorfartuisoq. Naalakkersuisuttaaq pingaartippaat Ilageeqarneq atorfilinnut soqutiginnittunullu allanut nuannaarutaasumik naapertuuttumik aaqqissugaasoq. Inatsisissatut siunnersuutikkut Naalakkersuisut kissaatigaat inatsisip ullutsinnut naleqqunnerusup piulernissaa ilageeqarnermi ineriartornikkut pitsaasunik tunngavissaqalersitsisoq.

Naalakkersuisut isumaqarput ilageeqarnikkut aaqqissugaaneq politikkikkut aaqqissugaanertut aqunneqartariaqanngitsoq inatsisissatullu siunnersuutikkut kissaatigalugu ilageeqarnerup ullumikkornit imminut aqunnerunissamut periarfissaqarnissaa.

Inatsisissatut siunnersuutikkut allaffissornermi suliassat ullumikkut naalakkersuisoqarfikkut ingerlanneqartut Biskoppeqarfimmut Ilageeqarnerup iluani suliassanut piginnaasaqarfiusumut tunniunneqarnissaat siunertarineqarpoq. Tunniussinermit tassunga aallaaviuvoq maannakkut inatsisaasoq allaffissorikkut upperisakkullu suliassani nalornilersitsisarmat ilagiilerinermi suliaqartunit tamanit akornutaasutut isumaqarfigineqartumik. Aammattaaq provsteqarfinni ataatsimiititaliat atorunnaarsinnerisigut ilagiit provsteqarfinni pingasuni aalajangiisarnernut toqqaannarnerusumik sunnuteqarsinnaalissapput. Maannakkut inatsisaasumut naleqqiullugu inatsisissatut siunnersuut ilageeqarnermi atorfillit ilagiittut inuunermi tunngavissat nukittorsarnissaannut inerisarnissaannullu periarfissinneqassapput.

Inatsisissatut siunnersuutikkut matumuuna Naalackersuisut kissaatigaat innuttaasut ilagiit ataatsimoorfiusutut ataqatigiiffiusutullu misigisimaffigilissagaat, tassa ilagiinni ingerlatsinerup annersaa ataatsimut eqiterneqarmat.

Taama naatsumik oqaaseqarlunga siunnersuut Inatsisartunut oqallisissanngortippara.